

CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE DA XUNTA DE GALICIA E CÁRITAS FEDERADAS DA PROVINCIA ECLESIAÍSTICA DE SANTIAGO DE COMPOSTELA - CÁRITAS FEDERADAS EN GALICIA PARA A REALIZACIÓN DE ACCIÓNS FORMATIVAS DE LINGUA E CULTURA GALEGAS

En Santiago de Compostela

REÚNENSE

Dunha parte, a Consellería de Cultura, Lingua e Xuventude e, no seu nome e representación, José Carlos López Campos, en virtude do seu cargo de conselleiro de Cultura, Lingua e Xuventude, para o que foi nomeado polo Decreto 44/2024, do 14 de abril, polo que se nomean os titulares das consellerías da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia, así como o Decreto 146/2024, do 20 de maio, polo que se establece a estrutura orgánica da Consellería de Cultura, Lingua e Xuventude.

Doutra parte, Cáritas Federadas da provincia eclesiástica de Santiago de Compostela – Cáritas Federadas en Galicia (en adiante, Cáritas Federadas en Galicia) e, no seu nome e representación, M.^a Victoria González Rodríguez, en virtude do seu cargo de directora de Cáritas Federadas en Galicia, con NIF R1500444C e con domicilio na rúa Carreira do Conde, núm. 14, CP 15701, en Santiago de Compostela (A Coruña), segundo nomeamento do 20 de setembro de 2025, sendo efectivo dito nomeamento desde o 1 de febreiro de 2026 e escritura pública outorgada ante a notaría de Santiago de Compostela D.^a Inmaculada Espiñeira Soto o 14 de xaneiro de 2026, co número 69 do seu protocolo

EXPOÑEN

Primeiro. Que ambas as entidades consideran como referente normativo básico da súa actuación o Estatuto de autonomía de Galicia e mais a Lei 3/1983, do 15 de xuño, de normalización lingüística, onde se recoñece que o galego é a lingua propia de Galicia e que os poderes públicos garantirán o seu uso normal como lingua oficial da Comunidade Autónoma galega. As partes tamén colaborarán na execución do Plan xeral de normalización da lingua galega que aprobou, por unanimidade, o Pleno da Cámara do Parlamento de Galicia na súa sesión do día 21 de setembro de 2004 coa finalidade de estender o uso do galego a todos os ámbitos da sociedade, así como na dinamización da lingua galega no tecido económico para favorecer o seu uso nas relacións laborais, comerciais e empresariais, co fin de incrementar produtos e servizos en galego en todos os ámbitos sociais e económicos.



Segundo. Que, no ámbito da Administración autonómica galega, a Consellería de Cultura, Lingua e Xuventude, a través da Secretaría Xeral da Lingua, ostenta as competencias de promoción e ensino da lingua galega, así como a dirección, planificación, coordinación e execución da política lingüística da Xunta de Galicia. Para este efecto, e para poder actuar en todos os ámbitos sociais, ten que colaborar, na medida do posible, coas institucións e entidades que desenvolven a súa actividade en Galicia.

Terceiro. Que a entidade Cáritas Federadas en Galicia é unha institución sen ánimo de lucro que traballa a prol do desenvolvemento social, educativo e cultural de Galicia, promovendo dende a súa creación proxectos de acción dirixidos a mellorar e fortalecer o futuro da sociedade galega en xeral. Entre esas liñas de acción, figuran as relativas aos procesos de acompañamento e integración a través da formación dirixida a persoas chegadas a Galicia co fin de que este reverta nun mellor arraigamento e sentimento de pertenza a través da lingua. Neste senso, xa ten experiencia na implantación deste tipo de proxectos e ademais conta coa capacidade para os levar a cabo.

Cuarto. Que Cáritas Federadas en Galicia é unha entidade con personalidade xurídica propia e plena capacidade de obrar para o cumprimento dos seus fins de interese xeral e público, inscrita no Rexistro de Entidades Relixiosas dependente do Ministerio de Presidencia, Relacións coas Cortes e Memoria Democrática, co núm. 026064, con data de inscrición 11/11/2021, que participa activamente nos esforzos das persoas que atende para mellorar as súas condicións de vida e tratar de espertar e fomentar as súas iniciativas e aspiracións, así como a súa inclusión social a través dos programas de integración das Cáritas Diocesanas que a constitúen.

Quinto. Que a Consellería de Cultura, Lingua e Xuventude e Cáritas Federadas en Galicia son conscientes da importancia do cumprimento do establecido sobre normalización lingüística e da responsabilidade que nesta materia teñen todas as entidades e institucións galegas na consecución dun interese e un obxectivo común, que é o de promover e fomentar o uso da lingua galega. Así mesmo ambas as partes teñen a vontade de incluír nas actuacións formativas, formación dirixida aos colectivos específicos incluídos no II Plan galego contra a trata de persoas con fins de explotación sexual 2026-2029 que presta especial atención ás vítimas máis vulnerables.

De acordo co exposto, ambas as partes recoñecen reciprocamente as súas competencias e manifestan a súa vontade de asinar este convenio de colaboración, que se rexerá polas seguintes



CLÁUSULAS:

Primeira. Obxecto

Este convenio ten por obxecto establecer as bases polas que se rexerá a colaboración entre a Consellería de Cultura, Lingua e Xuventude, a través da Secretaría Xeral da Lingua, e Cáritas Federadas en Galicia para promover o emprego do galego e o coñecemento da cultura galega en distintos ámbitos da poboación e en todos os contextos da sociedade, dirixíndose particularmente aos novos galegos e galegas provenientes do exterior.

O convenio prevé un dobre obxectivo. Por unha banda, fomentar a integración e a inclusión sociocultural efectiva das persoas participantes, dado que aprender o idioma do país de acollida é esencial para integrarse con éxito, e, por outra banda, aproveitar o enorme potencial que supón a chegada de novos galegos e galegas como un xeito de incrementar o número de falantes da nosa lingua.

Segunda. Obrigas de Cáritas Federadas en Galicia

Mediante a sinatura deste convenio, Cáritas Federadas en Galicia comprométese a realizar no ano 2026 as seguintes accións formativas:

Curso de introdución á lingua e á cultura galegas

Número de cursos: 22

Duración de cada curso: 20 horas

Modalidade: Presencial

Número de persoas por curso: Os cursos deberán ter un mínimo de 10 alumnos/as e un máximo de 20 alumnos/as. Haberá un mínimo de 20 prazas dirixidas aos colectivos específicos recollidos no II Plan galego contra a trata de persoas con fins de explotación sexual 2026-2029.

Localidades onde se impartirán os cursos: O Valadouro (1), Cospeito (1), Cedeira (1), Ferrol (2), Ourense (3), Verín (1), Santiago (3), A Coruña (3), Betanzos (1), Arzúa (1), Noia (1), Vigo (3), Ponteareas (1).

Obxectivos e/ou impacto esperado:

Introdución á lingua: familiarizarse coa fonética, o alfabeto e as regras básicas de pronunciación do galego.



Vocabulario esencial: aprender palabras e expresións cotiás (saúdos, presentacións, números, días da semana etc.).

Frases básicas: construír frases sinxelas para a comunicación en situacións comúns da vida cotiá.

Comprensión oral e escrita: desenvolver a capacidade de entender mensaxes básicas en textos e conversas sinxelas.

Interacción oral: practicar diálogos básicos.

Conciencia cultural: introducir aspectos culturais e lingüísticos que axuden a contextualizar o idioma.

A través desta formación, tamén se pretende:

Competencia comunicativa inicial: mellorar a capacidade para desenvolverse en interaccións sinxelas en galego.

Maior confianza: perder o medo a falar e a escribir en galego en contextos informais.

Sensibilización lingüística e cultural: fomentar a comprensión do valor e da presenza do galego en Galicia e noutras rexións.

Motivación para seguir aprendendo: incentivar o alumnado a profundar no estudo do idioma tras o curso.

Contidos:

Nocións básicas de lingua galega (vocabulario, expresión oral e escrita).

Cultura e historia de Galicia (festas, tradicións, gastronomía, música, historia...).

Recursos prácticos para a comunicación no día a día.

Perfil das persoas participantes:

Persoas maiores de 16 anos ou que os fagan no ano 2026, que desexen adquirir ou mellorar as súas competencias en lingua galega e os seus coñecementos sobre a cultura de acollida. Non se requiren coñecementos previos de galego, xa que as clases estarán adaptadas a diferentes niveis.

Perfil docente:

Grao en Lingua e Literatura Galegas, grao en Estudos de Galego e Español, grao en Galego e Portugués: Estudos Lingüísticos e Literarios, ou as licenciaturas equivalentes aos citados graos, ou ben outras titulacións superiores xunto co Certificado de lingua galega 5 (Celga 5). Excepcionalmente, poderán impartir os cursos persoas co Certificado de lingua galega 4 ou equivalente e experiencia no ensino ou na transmisión de coñecementos lingüísticos a persoas adultas, así como habilidades comunicativas e didácticas para facilitar a aprendizaxe nunha contorna inclusiva.



Perfil técnico/a:

Será responsable da xestión e coordinación do programa. Contará con formación no ámbito social e/ou educativo e experiencia na xestión de proxectos formativos. As súas funcións incluírán a captación de participantes, a organización das sesións, a programación das accións formativas, o seguimento do desenvolvemento dos cursos e a avaliación do seu impacto. Terá experiencia no traballo con poboación migrante, así como coñecementos sobre normativa e recursos de integración sociolaboral.

Metodoloxía:

Enfoque comunicativo: aprendizaxe baseada en situacións reais de comunicación.

Aprendizaxe participativa: dinámicas grupais, xogos de rol e simulacións.

Material adaptado: uso de recursos accesibles e visuais, seguindo modelos da Xunta de Galicia.

Atención á diversidade: adaptación aos distintos niveis de alfabetización e coñecemento da lingua.

Avaliación e seguimento:

Avaliación continua: observación do progreso da aprendizaxe da lingua oral e escrita.

Práctica finais: proba final de avaliación da aprendizaxe.

Diploma do curso: entrega do certificado que acredita, se é o caso, a participación con aproveitamento do alumnado.

Recursos e materiais:

Curso de introdución á lingua e á cultura galegas, en formato dixital e impreso, da Secretaría Xeral da Lingua.

Manual Celga: *Aula de Galego 1.*

Fichas didácticas, audios e vídeos en galego básico.

Apoio dixital (aplicacións e webs de aprendizaxe).

Xestión dos cursos:

Cáritas Federadas en Galicia, xunto coas Cáritas Diocesanas que a integran (Cáritas Diocesana de Mondoñedo-Ferrol, Cáritas Diocesana de Ourense, Cáritas Diocesana de Santiago de Compostela e Cáritas Diocesana de Tui-Vigo), terá que realizar as seguintes funcións:

- Designar unha persoa coordinadora responsable do curso, así como o persoal docente, e comprobar que reúnen os requisitos correspondentes.
- Organizar material e loxisticamente os cursos.



- Difundir a actividade e darlle a oportuna publicidade.
- Realizar a xestión administrativa do curso-
- Seguir as directrices técnicas e pedagóxicas correspondentes na impartición dos cursos.
- Manter actualizada a información relativa aos cursos e comunicarlle calquera incidencia á Secretaría Xeral da Lingua.
- Atender os requirimentos de información realizados pola Secretaría Xeral da Lingua.
- Colaborar nas accións de avaliación e mellora do programa.
- Presentar toda a documentación requirida nos prazos establecidos. Conservar a documentación relacionada coa actividade durante o período legalmente establecido.

Terceira. Diploma do curso

O alumnado que participe con aproveitamento no curso recibirá o correspondente diploma, que emitirá a Secretaría Xeral da Lingua, e para o cal Cáritas Federadas en Galicia lle facilitará a esta os datos que sexan necesarios, así como outros que poidan precisarse en relación co desenvolvemento da acción formativa.

A expedición do correspondente diploma estará condicionada ao cumprimento de requisitos relativos a contidos, duración, profesorado, metodoloxía e avaliación. Correspóndelle á Secretaría Xeral da Lingua a verificación do cumprimento destes requisitos.

Cuarta. Modificación do convenio/redistribución de cantidades

Se posteriormente á sinatura do convenio, e por circunstancias debidamente xustificadas, a entidade quere modificar ou cambiar algunha das accións contempladas no obxecto do convenio, esta modificación ou cambio instrumentarase mediante a correspondente addenda, agás naqueles casos nos que a modificación implique só unha redistribución das cantidades previstas, de ser o caso, para cada unha delas, segundo a desagregación prevista na memoria xustificativa e económica do convenio que figura no expediente de gasto sen que exista modificación orzamentaria respecto do importe total do convenio nin que implique, de ser o caso, unha redistribución orzamentaria entre diferentes capítulos de gasto.

Os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de



modificación cando teñan como finalidade o logro dos obxectivos de estabilidade orzamentaria e sostibilidade financeira.

As ditas modificacións terán por obxecto a redución do volume das obrigas ou a ampliación do seu prazo de execución.

Quinta. Financiamento

A Consellería de Cultura, Lingua e Xuventude, a través da Secretaría Xeral da Lingua, contribuirá ao financiamento deste convenio cunha cantidade total de trinta e tres mil euros (33.000,00 €), con cargo á aplicación 13.02.151A.640.2 dos orzamentos xerais da Comunidade Autónoma de Galicia para o ano 2026. O importe desagregado das actividades do convenio recóllese no anexo I.

Esta achega financiará exclusivamente o custo de organización e realización das actividades obxecto deste convenio, sen que ningunha das partes poida obter ningún tipo de lucro.

A titularidade e o uso dos resultados froito deste convenio serán comúns para as partes asinantes. A difusión dos estudos, publicacións e demais materiais terán carácter gratuíto para calquera delas, logo do consentimento da outra.

Ademais, cómpre destacar que a actuación obxecto deste convenio de colaboración está prevista na planificación estratéxica da Secretaría Xeral da Lingua.

No anexo I desagregase a cantidade total do convenio.

Sexta. Xustificación e pagamento

A documentación requirida na fase xustificativa presentarase telematicamente accedendo ao expediente na Carpeta do cidadán da persoa solicitante/representante, <https://sede.xunta.gal/carpeta-do-cidadan> (código de procedemento PR004A).

Cáritas Federadas en Galicia percibirá a achega da Consellería de Cultura, Lingua e Xuventude do seguinte xeito:

Para percibir a achega da Consellería de Cultura, Lingua e Xuventude, Cáritas Federadas en Galicia presentará telematicamente, coa data límite do 15 de novembro de 2026, a seguinte documentación:



- Certificación da execución das actividades do convenio, xunto coa que se achegará a xustificación dos gastos correspondentes. Esta realizarase mediante facturas, recibos de nóminas, boletíns de cotización e documento de liquidación das axudas de custo.
- Un informe de resultados das actividades realizadas no marco do convenio e da súa incidencia na promoción da lingua e cultura galegas.
- Para o control das actividades que se prevén no convenio, no caso de que se elaboren materiais, reproducións ou publicacións relacionadas coas actuacións acordadas, entregárase un exemplar destas.
- Ficha resumo de execución do convenio, na que se indique o número de proxectos, accións ou actividades que se realicen ao abeiro deste, as localidades de execución ou realización, así como o número de persoas destinatarias ou beneficiarias coa súa correspondente desagregación por sexos.

No caso de que a xustificación dos gastos sexa inferior ao importe do convenio, a achega da Consellería de Cultura, Lingua e Xuventude diminuírase proporcionalmente. Este convenio é compatible coa percepción doutras subvencións, axudas, ingresos ou recursos para a mesma finalidade. Non obstante, o seu importe en ningún caso poderá ser de tal contía que, illadamente ou en concorrencia con outras axudas, ingresos ou recursos, supere o custo da actividade apoiada, de acordo co establecido no artigo 40.1 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

Calquera alteración das condicións tidas en conta neste convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación daquel.

Antes de asinar este convenio e o pagamento, Cáritas Federadas en Galicia deberá presentar:

- Un certificado de non ter pendente de pagamento ningunha débeda coa Administración pública da Comunidade Autónoma de Galicia, expedido pola Consellería de Facenda e Administración Pública.
- Un certificado de estar ao día das obrigas tributarias, expedido pola correspondente delegación ou axencia do Ministerio de Facenda.
- Un certificado de atoparse ao día das obrigas sociais, expedido pola Tesourería Xeral da Seguridade Social.



Non obstante, a sinatura deste convenio comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesourería Xeral da Seguridade Social e a Consellería de Facenda e Administración Pública da Xunta de Galicia.

Cáritas Federadas en Galicia utilizará o galego en todas as comunicacións que estableza coa Consellería de Cultura, Lingua e Xuventude.

Cáritas Federadas en Galicia facilitará toda a información que lle sexa requirida pola Consellería de Cultura, Lingua e Xuventude, así como pola Intervención Xeral da Comunidade Autónoma, polo Consello de Contas e polo Tribunal de Contas no exercicio das súas funcións de fiscalización e control.

Sétima. Utilización da lingua galega e asesoramento

Todas as accións e actividades que se realicen ao abeiro deste convenio deberanse levar a cabo de acordo co indicado nas vixentes normas ortográficas e morfolóxicas do idioma galego, aprobadas pola Real Academia Galega no ano 2003, tal e como se establece na disposición adicional da Lei 3/1983, do 15 de xuño, de normalización lingüística. Así mesmo, coidarase especialmente do respecto rigoroso da toponimia oficial nos termos previstos no artigo 10 da citada lei.

A Consellería de Cultura, Lingua e Xuventude, a través da Secretaría Xeral da Lingua, comprométese a facilitarlle á Cáritas Federadas en Galicia, cando sexa preciso, o apoio e o asesoramento técnico necesarios en relación con aspectos lingüísticos e terminolóxicos relacionados coas actividades deste convenio.

Oitava. Difusión da colaboración das partes

Nas actuacións informativas e divulgativas e nas publicacións que se fagan relacionadas coas actividades deste convenio farase constar, nun lugar destacado, a colaboración das partes e utilizaranse, cando proceda, os anagramas de cada unha das entidades aprobados pola normativa de identidade corporativa.

Sexa cal for o medio de difusión, calquera das dúas partes comprométese a facer mención da outra parte e deste convenio.

Novena. Vixencia



Este convenio estará vixente dende a data da súa sinatura ata o 30 de decembro de 2026. Non obstante, poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dos compromisos adquiridos, o que se comunicará de xeito fidedigno, logo da audiencia da outra parte e con, polo menos, un mes de antelación.

Décima. Comisión de seguimento

Coa finalidade de asegurar o cumprimento deste convenio, crearase unha comisión paritaria de seguimento composta por dous representantes da Secretaría Xeral da Lingua nomeados polo seu titular e dous representantes da Cáritas Federadas en Galicia, que coordinará o seu desenvolvemento. Esta comisión, que estará presidida por un dos representantes da Secretaría Xeral da Lingua, estará facultada para resolver cantas dúbidas poidan xurdir na súa execución, para o que poderá estar asistida polo persoal técnico necesario.

Décimo primeira. Causas de resolución

Este convenio resolverase:

- Por incumprimento total ou parcial dalgunha das súas cláusulas.
- Polo transcurso do tempo estipulado sen que se culminen as actuacións acordadas.

De se resolver o convenio, a Consellería de Cultura, Lingua e Xuventude pode, se é o caso, esixir a devolución da cantidade achegada.

Décimo segunda. Responsabilidades das actuacións

A sinatura deste convenio non implica relación contractual de ningún tipo entre as persoas que desenvolvan as actividades previstas e a Xunta de Galicia, de tal xeito que a esta non se lle pode esixir responsabilidade ningunha –directa, indirecta ou subsidiaria– polos actos ou feitos acontecidos no desenvolvemento do convenio.

Décimo terceira. Avaliación de resultados

A Consellería de Cultura, Lingua e Xuventude, a través da Secretaría Xeral da Lingua, avaliará a realización das actividades contempladas na cláusula segunda do convenio e a súa incidencia efectiva na dinamización da lingua.



A Consellería de Cultura, Lingua e Xuventude, a través da Secretaría Xeral da Lingua, realizará o seguimento e a avaliación das actuacións desenvolvidas ao abeiro deste convenio, co fin de verificar o seu adecuado cumprimento, o grao de consecución dos obxectivos previstos e a incidencia efectiva das actividades realizadas na promoción, difusión e dinamización da lingua galega.

Para estes efectos, poderá solicitar á entidade colaboradora a información, documentación e indicadores que considere necesarios para avaliar o desenvolvemento das actuacións, o nivel de participación alcanzado, os resultados obtidos e o impacto das actividades no ámbito territorial ou sectorial correspondente.

Os resultados da avaliación poderán ser tidos en conta para a planificación de futuras actuacións de colaboración entre as partes e para a mellora continua das iniciativas de promoción e dinamización da lingua galega.

Décimo cuarta. Rexistro de convenios. Transparencia e bo goberno

A sinatura deste convenio suporá o consentimento expreso da entidade á Administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, de transparencia, acceso á información pública e bo goberno, e co Decreto 126/2006, do 20 de xullo, polo que se regula o rexistro de convenios da Xunta de Galicia.

Así mesmo, coa sinatura deste convenio as partes manifestan o seu consentimento para que os datos persoais e mais o resto das especificacións contidas nel poidan ser publicados no Portal da Transparencia e Goberno Aberto.

Décimo quinta. Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas e, polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.



As notificacións realizaranse só por medios electrónicos a través do Sistema de notificación electrónica de Galicia - Notifica.gal, <https://notifica.xunta.gal>. Para poder acceder a unha notificación electrónica, a persoa interesada deberá contar cun usuario e clave no servizo Chave365 ou cun certificado electrónico de persoa física ou xurídica asociado ao NIF da persoa destinataria. Así mesmo, a persoa interesada pode autorizar a calquera outra a que acceda ao contido das súas notificacións.

Décimo sexta. Protección de datos de carácter persoal e dereitos dixitais

As partes asinantes comprométese a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dos dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro, de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

Décimo sétima. Administración dixital

As partes asinantes respectarán cantas esixencias establece a Lei 4/2019, do 17 de xullo, de administración dixital de Galicia, que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia, pola Administración xeral e polas entidades instrumentais.

Tamén lle será aplicable á cidadanía que ten o deber de utilizar os servizos públicos dixitais que se poñan á súa disposición de xeito adecuado, co respecto das normas de uso, xerais ou específicas, que se establezan para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicas de que sexan lexítimos titulares, usar a información dispoñible conforme a política de privacidade publicada e respectar a normativa en materia de protección de datos de carácter persoal [artigos 2 a) e b) e 7, apartados 1 e 2, respectivamente, da citada lei].



Décimo oitava. Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas estipulacións, así como polo disposto nos artigos 47 e seguintes da Lei 40/2015, do 1 de outubro, do réxime xurídico do sector público.

Aínda que está excluído do ámbito de aplicación da Lei 9/2017, do 8 de novembro, de contratos do sector público, segundo o seu artigo 6, ao non previsto aplicaráselle, de acordo co artigo 4 da citada lei, os principios recollidos nela, co fin de resolver dúbidas e omisións que puidesen presentarse. Así mesmo, supletoriamente terase en conta o Decreto legislativo 1/1999, do 7 de outubro, pola que se aproba o texto refundido da Lei de réxime financeiro e orzamentario de Galicia e demais normativa vixente na materia.

A xurisdición contencioso-administrativa será a competente para dirimir as cuestións que puidesen xurdir na aplicación deste convenio.

Ambas as partes manifestan estaren de acordo co estipulado e asinan este convenio.

O conselleiro de Cultura, Lingua
e Xuventude

A directora de Cáritas Federadas
en Galicia

José Carlos López Campos

M.^a Victoria González Rodríguez



ANEXO I**ORZAMENTO DESAGREGADO DAS ACTIVIDADES DO CONVENIO POR ACCIÓNS E LIÑAS DE GASTO****CADRO DO IMPORTE TOTAL DO PROXECTO**

Liñas de acción/actividades do convenio	
Actividade/acción, descrición: 22 Cursos de introdución á lingua e á cultura galegas Duración de cada curso: 20 horas Modalidade: presencial N.º de persoas por curso: 10-20 N.º de cursos: 22 Localidades: O Valadouro (1), Cospeito (1), Cedeira (1), Ferrol (2), Ourense (3), Verín (1), Santiago (3), A Coruña (3), Betanzos (1), Arzúa (1), Noia (1), Vigo (3), Ponteareas (1)	
Desagregación das liñas de gasto	Importe
1.ª) Gastos do persoal do programa	22.930,30 €
2.ª) Gastos de actividades e mantemento do programa	6.329,70 €
3.ª) Gastos de dietas e gastos de viaxes do programa	260,00 €
4.ª) Gastos de xestión e administración do programa	3.480,00 €
TOTAL	33.000,00 €

